

Die speelgroep waar kleuters so speel-speel al hoe slimmer word.

amelia@kleinsterre.co.za | +27 82 924 0994  
Garsfontein | Pretoria | [www.kleinsterre.co.za](http://www.kleinsterre.co.za)

Klein Sterretjies is 'n privaat speelgroep waar kleuters in 'n liefdevolle omgewing kan speel en leer. Hier leef ons Christelike beginsels en waardes uit. Ons is eksklusief halfdag met al die voordele daaraan verbonde.

### MEER OOR ONS PERSONEEL

#### Amelia Snyman

BA(HOD) BEd (Voorligting) MEd (Opvoedkundige Sielkunde) (Unisa)

Die hoof en eenaar is 'n gekwalifiseerde Opvoedkundige Sielkundige. Die behoefte is raakgesien om kleuters die geleentheid te gee om in 'n kleiner, huislike omgewing te ontwikkel en gereed te word vir skool en die wêreld daarbuite. Natuurlik steeds met genoeg maatjies om sosiaal optimaal te kan ontwikkel. Die speelgroep is in 2002 begin en ons eerste groep kleuters het reeds graad gevang.

#### Minette du Preez

B(Arbeidsterapie) US

'n Gekwalifiseerde arbeidsterapeut. Sy is vanaf 2007 deel van Sterretjies, eers as 'n mamma waarna sy in 2015 'n Sterretjie-juffrou geword het. Met arbeidsterapie as agtergrond, is sy 'n juffrou met baie begrip en insig in kleuters se vaardighede en ontwikkeling op alle gebiede.

#### Jolandé du Preez

BEd (Intermediêre fase) BEd Hons (Leerderondersteuning) UP

'n Gekwalifiseerde onderwyseres met baie liefde vir en verstaan van kinders. Sy het 'n natuurlike aanslag en baie geduld met kleuters.

### KLASSIES

Klein klassies vir individuele aandag. Ons beperk die aantal kinders in die skool, wat in drie klassies verdeel word. Die Goggaklas (by Amelia) is ingerig vir die jongste kleuters (2 – 3 jariges). Die middelgroepie (3 – 4 jariges) is in die Vissieklas by Jolandé en die oudste kleuters (4 – 5 jariges) is in die Papegaaiklas by Minette. Daar is ook twee voltydse assistente (Linky en Elsie) wat handjie bysit. Die Goggaklas se kleuters het 'n opsie om enige twee, drie of vier dae van die week speelgroep toe te kom. Die Goggaklas is oop van Maandae tot Donderdae. Vissieklas- en Papegaaiklas kleuters geniet dit om elke weeksdag te kom.

### TYE EN VAKANSIES

Speelgroepie tye is van 7:30 – 13:00.

Aflaaityd is van 7:30 – 8:30 sodat ons dan met die program kan begin. Daar is soggens vanaf 7:00 'n personeellid om kleuters te ontvang indien ouers verkies om hul vroeër af te laai. Kleuters kan enige tyd tussen 12:00 en 13:00 afgehaal word. Indien daar 'n behoefte is, sal daar 'n wagklassie van 13:00 – 14:00 beskikbaar wees. Dit moet asb vooraf met die personeel gereël word. Ons sluit saam met die publieke skole vir 4 vakansies deur die jaar. Daar is ook sommige langnaweke en dae rondom publieke vakansiedae wat die publieke skole gesluit is, wat ons ook sluit.

### SPESIALE HEMPIES EN SPESIALE DAE

Ons het blou en pienk Klein Sterretjies-hempies wat spesiaal vir elke kleuter gemaak word. Ons trek almal op Maandae hierdie hempies aan asook wanneer ons op uitstappies gaan.

Ons reël vir elke kwartaal 'n spesiale dag soos uitstappies, 'n mammadag, 'n sportdag, instappies en elke jaar 'n groot konsert. Ons wissel elke jaar Mammadag en Ouma- & Oupadag af. In 2024 hou ons weer Ouma- & Oupadag. Die nodige inligting word lank voor die tyd deurgegee.

## DISSCIPLINE EN STRUKTUUR

Daar is duidelike struktuur en roetine wat elke dag gevolg word. Die kleuters voel veilig binne hierdie struktuur en weet wat van hulle verwag word. Ons handhaaf positiewe dissipline (aanmoediging eerder as straf) by die speelgroep en moedig kinders aan om gemanierd met mekaar en met die personeel om te gaan.

## ANDER HULP

Ons beskou dit as deel van ons plig om enige aspek rakende die kind waaroor ons trots is of dalk bekommerd is met die ouers te bespreek. Indien ons dink dat dit nodig is vir 'n arbeidsterapeut, spraakterapeut of enige ander professionele persoon om die kleutertjie te evalueer sal ons die vrymoedigheid hê om dit aan jul oor te dra.

## PRAKTIESE REËLINGS

Elke kind moet asb sy eie gemerkte tas of sak saambring. Elke kind bring sy eie kosblik met gesonde versnaperinge vir “broodjie-tyd” ongeveer 10:00. Elkeen bring ook sy eie drinkgoed in 'n gemerkte waterbottel. Moet asb nie blikkies of boksie-sap stuur nie, dit val om en mors te maklik.

Asseblief geen lekkers, koekies of “chips” in die kosblik nie. Almal word lus en vra daarvoor. Toebroodjies bly 'n wenner. Vrugte, droë vrugte, kaas, biltong, soutkoekies, koue vleis of worsies is gesonder en kan gerus ingesit word. Ons kan ongelukkig nie yogurt toelaat nie – dit word te maklik deur ander kinders omgestamp en moet liefes by die huis geëet word.

Die kleintjies moet asseblief nie hul eie speelgoed saambring nie. Dit raak weg, breek en veroorsaak konflik omdat almal daarmee wil speel. As dit iets is wat sekuriteit gee (soos 'n teddie of kombersie) kan dit gerus saamkom terwyl hul nog aanpas by die nuwe omgewing. Siek kleuters moet eerder nie speelgroep toe kom nie. 'n Siek kind voel nie lekker nie, en voel naderhand negatief oor die hele speelgroep-opset. 'n Loopneusie of 'n ligte hoësie is gewoonlik nie ernstig siek nie en hul kan kom. As 'n kind koors het, 'n maagvirus, kindersiekte, mangelontsteking of enige ander aansteeklike siekte moet hul asb nie kom nie – hul steek dalk net die ander aan. Indien 'n kind deur die loop van die oggend siek word sal ons die ouers bel en daarvan laat weet.

Pak asb 'n stel of twee ekstra klere in die tas. Ons speel soms met water of bak modderkoekies en kan nat word. Ander glipsies gebeur ook nog maklik. Kleuters op doeke moet asb ten minste 3 weggooi doeke en hul eie “wipes” saamstuur.

In die somermaande is dit baie warm. Smeer die kinders met sonroom voor hul soggens skool toe kom. Stuur gerus 'n sonhoed wat ons kan opsit as ons buite speel. Ons sandput het 'n dak oor vir koelte en daar is baie ander koelte plekkies waar die kinders ook heerlik kan speel op die warm dae.

Ons moedig kaalvoete aan. Dis gesond vir die voetjies se ontwikkeling en die skoene raak tog so maklik weg en deurmekaar. Kyk maar of die weer dit toelaat.

Elke gesin kan asb elke jaar die volgende vrywillige bydraes vir ons bring:

- Tissues** : een pak per jaar
- “Wet wipes”** : vir vuil handjies en gesiggies – een pak elke kwartaal
- Seuntjies** : 3 rolle toiletpapier vir die jaar
- Dogtertjies** : 6 rolle toiletpapier vir die jaar

Baie dankie vir hierdie bydraes! Ons waardeer dit.

## BUITEMUURSE AKTIWITEITE

Daar word ekstra aktiwiteite deur buite persone aangebied. Ons is baie ingestel op die regte rolmodelle vir ons kleuters en kies daarom noukeurig die aktiwiteite en ook die persone wat dit kom aanbied. Ons oorlaai nie kleuters en ouers met keuses nie. Hierdie is vooraf uitgesoekte aktiwiteite wat ons kan aanbeveel.

### Playball

(Maandae 12:00 - 12:30)

Henk en sy span afrigters fokus op al die verskillende bal-sportsoorte. Basiese balvaardighede word mooi vasgelê. *“Children thrive in our fun-filled, high quality sport lessons. Creating a learning environment, which boosts confidence and self-esteem, is paramount. Your child will be coached to engage confidently in a wide range of sport skills preparing them for years of positive and competence sports participation.”*

[www.playballkids.com](http://www.playballkids.com)

### Ballet

(Donderdae 11:45)

Liezel het 'n wonderlike aanslag met die dogtertjies en hulle is baie lief vir haar. Verbeelding, luistervaardighede en grootmotoriese vaardighede word veral deur ballet ingeoefen.

[Liezel Marais Dance Academy](http://Liezel Marais Dance Academy)

### Tumbling Tigerz

(Donderdae 12:00)

Aspekte van gimnastiek, pilates, boks en sokker is gekombineer om hierdie groot-motoriese program saam te stel. Daar word weekliks klassies van 30minute aangebied deur entoesiastiese en goed gekwalifeseerde afrigters. Kinders se hele lyfie, van kop tot toon, word by hierdie aktiwiteit betrek.

[www.tumblingtigerz.co.za](http://www.tumblingtigerz.co.za)

Hierdie buitemuurse aktiwiteite is op tye geskeduleer wat nie inmeng met ons klastye nie. Inskrywings en kostes kan op navraag verkry word en bly die ouers se verantwoordelikheid. Daar word elke jaar in Januarie demonstrasie lesse aangebied. Ouers is welkom om te kom kyk na die verskillende aktiwiteite voordat enige inskrywings gedoen word.

## ONS PRENTJIES

Ons is baie lief vir prentjies maak en die prentjies word deur die kinders self gemaak. Ons doel is nie om meesterstukke huistoe te stuur nie, maar om vaardighede en kreatiwiteit te ontwikkel. Daar word ook gefokus op die emosionele aspekte soos waaghouding, trots en interaksie met die ander maatjies terwyl ons werk. Beplanningsvaardighede en blootstelling aan verskeie sensoriese stimuli geniet ook aandag terwyl ons prentjies maak. Genoeg ruimte word toegelaat om kreatiwiteit te ontwikkel soos wanneer hul kan verf/plak/teken na vrye keuse. Daar word ook aandag gegee aan die ontwikkeling van spesifieke vaardighede soos inkleur, kopieëring en om prentjies volgens instruksies te voltooi.

Soms bak-&-brou ons en dan maak ons prentjies wat ons kan opeet!